

Ignazi Hendry- Hendry 1925 - 1998

Tochen avon paucs meins, exactamein tochen ils 22 da matg 1998, ei il Nazi Hendry restaus tut persuls a casia. Ed el va ella historia sco davos habitont dil Plaun s. Leci a Cavorgia. El haveva pigliau ferma ragisch en siu carezau ambient e leva per negin prezi bandunar Maunsut. Il Nazi ei seriscudius ditg alla liunga e la finala ha el schau perschuader e cattau ina buna dimora ella casa da vegls s. Vigeli. Ins vess detg che la buna tgira e la cumpignia da ses quater fargliuns fetschien bein e laschien secumblidar. Cumpatg che la midada ei tuttina buca sefatga ton tgunsch.

Suenter ina cuorta maldispostadad eis el morts ils 27 d'uost 1998 ella vegliadetgna da 73 onns.

Il Nazi ei naschius ils 7 d'uost 1925 a Surrein sco fegl da Leci Antoni ed Anna Maria Hendry-Monn. Cun siat fargliuns eis el carschius si ella biala ucliava da Surrein. Priu ora il temps ch'el ei staus fumegl da purs a Zug eis el adina restaus da Maunsut. 1950 marida il Nazi la Maria Cecilia Schmid e secasa a Surrein. 3 onns pli tard serendan els a Cavorgia. A caschun dalla naschientscha dil tierz affon miera la cara dunna e mumma. Il Nazi ei seriscudius ed igl onn 1960 tuorna el a maridar cun Maria Barla Hendry-Caduff, morta igl onn 1987.

Cul Nazi dev'ins bugen ina paterlada. El era in um sempel e da siu fatg. Ins haveva l'impressiun ch'el seigi adina da buna veglia. Cun far il pur a Cavorgia daventa ins buca in rehun, denton tonpli cuntents. Siu muvel, dalla gaglina tochen alla pugniera, muntava pil Nazi quasi tut. Ed el ha giu bugen ses animals e beinduras carsinau e pupergnau els pli fetg che sesez.

Ils 29 d'uost vegn Ignazi Hendry - ensemens cun Serafin Cavegn - accumpignaus alla fossa. In grond conduct da bara ha rendiu honur a nos dus convischins. Ed il Nazi ha perfin astgau guder ina honur speciala. Al davos habitont dil Plaun s. Leci ha la Musica da Sedrun dedicau il davos choral.

Possi il Nazi guder aunc pli sublimas melodias leuvi en l'auter mund.

